



**O‘ZBEKISTON RESPUBLIKASI
DAVLAT BOJXONA QO‘MITASI RAISING
BUYRUG‘I**

2022 yil “48” mart

Toshkent shahri

№ 73

**Давлат божхона хизмати органлари алоқа каналлари орқали
коррупциявий хатти-ҳаракатлар тўғрисида келиб тушган хабарларни
қабул қилиш ва кўриб чиқишни тартибга солиш ҳақида**

Ўзбекистон Республикасининг “Коррупцияга қарши кураш тўғрисида”ги Қонуни ҳамда Ўзбекистон Республикаси Президентининг “Ўзбекистон Республикасида коррупцияга қарши курашиш тизимини такомиллаштириш бўйича қўшимча чора-тадбирлар тўғрисида” 2020 йил 29 июндаги ПФ-6013-сон, “Давлат органлари ва ташкилотларининг фаолияти очиқлигини таъминлаш, шунингдек, жамоатчилик назоратини самарали амалга оширишга доир қўшимча чора-тадбирлар тўғрисида” 2021 йил 16 июндаги ПФ-6247-сон фармонларига мувофиқ, коррупцияга қарши кураш соҳасидаги халқаро ташкилотлар тавсиялари ва илғор дунё тажрибаси, жумладан ISO 37001:2016 “Коррупцияга қарши кураш менежменти тизими – Талаблар ва уларни қўллашга доир тавсиялар” халқаро стандарти талаблари ва тавсияларини таъминлаш мақсадида, **буюраман:**

1. Давлат божхона хизмати органлари алоқа каналлари орқали коррупциявий хатти-ҳаракатлар тўғрисида келиб тушган хабарларни қабул қилиш ва кўриб чиқиш регламенти иловага мувофиқ тасдиқлансин.

2. Давлат божхона қўмитасининг Ахборот-коммуникация технологиялари ва киберхавфсизликни таъминлаш бошқармаси (А.Дустмухамедов) томонидан:

Давлат божхона қўмитасининг расмий телеграм ботини ишга тушуриш бўйича зарур чоралар кўрилсин;

Давлат божхона қўмитаси ягона автоматлаштирилган ахборот тизимининг “Профилактика” дастурида коррупцияга оид ҳаракатлар ҳақидаги хабарларни қайд қилиш реестри жорий этилсин.

3. Давлат божхона қўмитасининг Шахсий хавфсизлик бошқармаси (Б.Шарипов) томонидан божхона органларида коррупцияга оид ҳаракатлар ҳақидаги хабарларни қабул қилиш реестрига ўз вақтида маълумотлар киритиб борилсин.

4. Давлат божхона қўмитасининг марказий аппарати таркибий тузилмалари, Қорақалпоғистон Республикаси, вилоятлар, Тошкент шаҳар бўйича бошқармалари, “Тошкент-АЭРО” ИБК (кейинги ўринларда – ҳудудий бошқармалар), Марказий божхона лабораторияси, Божхона институти бошлиқлари ва Миллий кинология маркази директори томонидан интернетдаги мулоқот платформалари, божхона органларининг ижтимоий тармоқлардаги расмий канал ва саҳифалари ҳамда бошқа каналлари орқали божхона органларида коррупцияга оид ҳуқуқбузарликлар ҳақида маълумотлар келиб тушганда, зудлик билан ёзма шаклда Давлат божхона қўмитаси ёки ҳудудий бошқарма раҳбарини ҳамда Шахсий хавфсизлик тузилмаси ходимини хабардор қилиш таъминлансин.

5. Давлат божхона қўмитасининг Юридик бошқармаси (А.Дўстёров) ва ҳудудий бошқармалари, Марказий божхона лабораторияси, Божхона институти ва Миллий кинология маркази юридик хизматлари томонидан ушбу буйруқнинг туркумлаштирилган ҳисоби юритилсин.

6. Буйруқ ижросини таъминлаш Давлат божхона қўмитасининг Шахсий хавфсизлик бошқармаси (Б.Шарипов), ҳудудий бошқармалари, Марказий божхона лабораторияси, Божхона институти бошлиқлари ва Миллий кинология маркази директориға, умумий назорати Раис ўринбосарлари зиммасига юклансин.

**Раис,
божхона хизмати генерал-майори**

А.Мавлонов

**Давлат божхона хизмати органлари алоқа каналлари орқали
коррупциявий хатти-ҳаракатлар тўғрисида келиб тушган
хабарларни қабул қилиш ва кўриб чиқиш
РЕГЛАМЕНТИ**

1-боб. Умумий қоидалар

1. Мазкур Регламент Давлат божхона хизмати органлари (кейинги ўринларда – божхона органлари)да коррупцияга қарши курашиш, манфаатлар тўқнашувини аниқлаш ва тегишли таъсир чораларини кўришга қаратилган чора-тадбирларнинг самарадорлигини ошириш мақсадида ишлаб чиқилган.

2. Регламент божхона органларидаги алоқа каналлари орқали коррупциявий хатти-ҳаракатлар ҳақида келиб тушган хабарлар билан ишлашнинг асосий тамойиллари, шунингдек, хабарларни қабул қилиш, уларни рўйхатдан ўтказиш ва кўриб чиқиш, шунингдек, божхона органлари раҳбарига ҳисобот тақдим этиш тартибини белгилайди.

3. Ушбу Регламентда қуйидаги асосий тушунчалардан фойдаланилади:

мурожаатчи – алоқа каналлари орқали божхона органларидаги коррупциявий хатти-ҳаракатлар тўғрисида хабар бериш учун мурожаат қилган жисмоний, юридик шахс ёки божхона органи ходими;

манфаатлар тўқнашуви – шахсий (бевосита ёки билвосита) манфаатдорлик шахснинг мансаб ёки хизмат мажбуриятларини лозим даражада бажаришига таъсир кўрсатаётган ёхуд таъсир кўрсатиши мумкин бўлган ҳамда шахсий манфаатдорлик билан фуқароларнинг, ташкилотларнинг, жамиятнинг ёки давлатнинг ҳуқуқлари ва қонуний манфаатлари ўртасида қарама-қаршилик юзага келаётган ёки юзага келиши мумкин бўлган вазият;

коррупция – шахснинг ўз мансаб ёки хизмат мавқеидан шахсий манфаатларини ёхуд ўзга шахсларнинг манфаатларини кўзлаб моддий ёки номоддий наф олиш мақсадида қонунга ҳилоф равишда фойдаланиши, худди шунингдек бундай нафни қонунга ҳилоф равишда тақдим этиш;

коррупциявий ҳаракатлар – ходим томонидан бевосита ёки билвосита шахсан ёки учинчи шахслар орқали пора берувчи манфаатлари йўлида ҳаракат ёки ҳаракатсизлик учун моддий манфаатдор бўлиши, шу жумладан пул, қимматбаҳо қоғоз, бошқа кўринишдаги мулк ва мулкый ҳуқуқлар, мулкый

характердаги хизматлар олиш, талаб қилиш, ундириш, таклиф қилиш ёки бериш, пора бериш ва/ёки олиш ёки бунда воситачилик қилишда, расмийликларни соддалаштириш учун тўловлар ундириш (пора олиш) ва бошқа ноқонуний мақсадларда ўз хизмат вазифаларидан ноқонуний фойдаланиш;

коррупцияга оид ҳуқуқбузарлик – коррупция аломатларига эга бўлган, содир этилганлиги учун қонунчиликда жавобгарлик назарда тутилган қилмиш;

коррупцияга қарши курашиш тизими – амалдаги қонунчилик ва ички ҳужжатларни коррупциявий жиҳатдан бузилишини бартараф этиш, божхона органлари ходимлари томонидан юқори даражада касбий ва ахлоқий фаолият олиб боришларини таъминлаш бўйича чора-тадбирлар мажмуи;

коррупциявий хавф-хатар – ходимлар ёки учинчи шахслар томонидан божхона органлари номидан ва (ёки) уларнинг манфаатларини кўзлаб коррупциявий ҳаракатларни содир этиш хавфи;

тааллуқли хабар – божхона органларидаги коррупциявий ҳаракатлар ва (ёки) манфаатлар тўқнашуви ҳақидаги ахборотдан иборат бўлган хабар;

ходимнинг шахсий манфаатдорлиги – ходим томонидан ўз хизмат вазифаларини бажариши чоғида ўзи ёки учинчи шахсларнинг манфаатлари йўлида ходимнинг мансаб ёки хизмат мажбуриятларини лозим даражада бажаришига таъсир қилиши мумкин бўлган пул маблағлари, моддий ёки номоддий бойликлар, бошқа мол-мулк ва имтиёзлар кўринишида шахсий наф олиш имконияти (шахсий, ижтимоий, молиявий, сиёсий ва бошқа тижорий ёки нотижорий манфаатлари).

4. Божхона органлари коррупциявий ҳаракатлар ҳақида ахборот беришга мўлжалланган алоқа каналларининг ишини қуйидаги тамойиллар асосида ташкил этади:

конфиденциаллик ва хавфсизлик – алоқа каналларидаги хабарлардан фойдаланишга рухсат берилган божхона органларининг барча ваколатли шахслари ушбу хабарларни ваколатга эга бўлмаган шахсларга бериш (ошкор қилиш)га ҳақли эмас. Агар мурожаатчи ўз хабарини юборганлиги ҳақида бошқа ходимларга ёки учинчи шахсларга ўз хоҳишига кўра, жумладан, эҳтиётсизлиги натижасида ошкор қилган бўлса, божхона органлари унинг ошкор бўлишига жавобгар бўлмайди;

қонунийлик – божхона органлари алоқа каналларига келиб тушадиган хабарларни қабул қилиш, рўйхатга олиш, қайта ишлаш ва кўриб чиқиш қатъий равишда Ўзбекистон Республикаси қонунчилиги талаблари ва ушбу Регламентга мувофиқ амалга оширилади;

мурожаатчининг таъқиб қилинмаслиги – алоқа каналлари орқали коррупциявий ҳаракатлар ҳақида ўз хоҳишига кўра хабар берган жисмоний ва юридик шахс, хусусан божхона органлари ходими хабарнинг мазмунидан қатъий назар бирон-бир жавобгарликка тортилмайди;

мурожаатчи билан мажбурий тартибдаги қайта алоқа – агар хабар аноним бўлмаса, уни кўриб чиқиш натижалари божхона органлари томонидан мурожаатчига етказилиши лозим;

таъсир чораларини қўллашнинг мажбурийлиги – коррупция факти тасдиқланган тақдирда, божхона органлари айбдор шахсларни жавобгарликка тортиш учун Ўзбекистон Республикаси қонунчилигига мувофиқ ҳаракат қилади.

2-боб. Коррупцияга оид ҳаракатлар ҳақида ахборот бериш учун алоқа каналлари

5. Тааллуқли хабар қуйидаги алоқа каналларидан юборилиши мумкин:
Ўзбекистон Республикаси Президентининг виртуал қабулхонаси орқали;
Давлат божхона қўмитаси (кейинги ўринларда – ДБҚ)нинг расмий веб-сайти ёки электрон почтаси орқали;

ДБҚнинг ижтимоий тармоқлардаги расмий канал ва саҳифалари орқали;
“Коррупция фактлари тўғрисида Давлат божхона органларига хабар юбориш” интерактив хизмати орқали;

ДБҚнинг телефон рақамлари орқали (ишонч ва бошқа иш телефон рақамлари орқали);

ДБҚнинг расмий телеграм боти;

ДБҚга оғзаки (шахсан) мурожаат қилиш;

хукукни муҳофаза қилувчи органлар орқали;

мазкур Регламентда кўрсатилмаган бошқа алоқа каналлари.

6. Божхона органлари алоқа каналлари тўғрисидаги ахборотни расмий веб-сайт ва ижтимоий тармоқдаги саҳифа ва каналларига жойлаштиради, шунингдек, ходимларга даврий равишда юбориладиган электрон хатлар тарқатмаларига ва ўқув материалларига киритади, божхона органлари биносида жойлаштириладиган тематик плакатлар ва ҳоказоларда акс эттиради.

3-боб. Алоқа каналлари орқали келиб тушаётган тааллуқли хабарларни қабул қилиш

7. Ушбу Регламентнинг 5-бандида кўрсатиб ўтилган алоқа каналлари орқали келиб тушган хабарлар Вазирлар Маҳкамасининг 2018 йил 7 майдаги 341-сон қарори билан тасдиқланган Давлат органларида, давлат муассасаларида ва давлат иштирокидаги ташкилотларда жисмоний ва юридик шахсларнинг мурожаатлари билан ишлаш тартиби тўғрисидаги намунавий низом ва Божхона

органларининг жисмоний ва юридик шахсларнинг мурожаатлари билан ишлаш тартиби тўғрисидаги низом талабларида назарда тутилган тартибда рўйхатга олинади ва резолюция учун раҳбариятга чиқарилади.

8. Божхона органларига алоқа каналлари орқали тааллуқли хабар келиб тушганда масъул ходим зарурат бўлганда мурожаатчи билан электрон ёзишма йўли билан ёки телефон орқали боғланиб керакли бўлган қўшимча ахборотни аниқлаштиради ва маълумотни божхона органлари раҳбарига киритади.

Келиб тушадиган хабарлар ҳафтанинг душанбадан жумагача соат 09:00 дан 18:00 га қадар таҳлил қилинади. Агар хабар иш вақтидан ташқари пайтда келиб тушса, бу хабар навбатдаги иш кунида аниқлаштириш учун сақланади.

9. Агар мурожаатчи ўз хабарини тасдиқлаш учун қўшимча материалларга, масалан, фотоматериаллар, ҳужжатлар, аудио ва видеоёзувларга эга бўлса, мурожаатни қабул қилишга масъул ходим уларни тақдим этиш бўйича фойдаланиладиган алоқа каналларини (телеграм боти ёки электрон почтаси)ни кўрсатади ва тақдим этиладиган маълумотни конфеденциаллигини билдиради. Мазкур маълумотлар тааллуқли хабарга илова сифатида расмийлаштирилади.

10. Божхона органлари раҳбари тааллуқли хабарни тезкорлик билан таҳлил қилиш ва кўриб чиқиш учун ДБҚ Шахсий хавфсизлик бошқармасига топшириқ туширади.

11. Божхона органларининг Шахсий хавфсизлик бошқармаси тааллуқли хабарни олгандан кейин 1 (бир) соат ичида уни иловага мувофиқ шаклда божхона органларида коррупцияга оид ҳаракатлар ҳақидаги хабарларни қабул қилиш реестрида (кейинги ўринларда – Реестр) рўйхатга олиши ва ушбу Регламентнинг 4-бобига мувофиқ кўриб чиқиши лозим.

12. Масъул ходим томонидан мурожаатчиларга содир этилган коррупциявий ҳаракатлар тўғрисида аноним хабарлар қолдириш имконияти берилади.

Аноним хабар келиб тушган тақдирда масъул ходим, имкон мавжуд бўлган тақдирда, қуйидагиларни амалга ошириши лозим:

келиб тушган хабарга жавоб бериш учун мурожаатчи билан боғлана олмасликлари мумкинлиги ҳақида маълум қилиши;

қўшимча зарур маълумот олиш имконияти бўлмаган тақдирда хабарни тўлиқ ва ҳар томонлама ўргана олмасликларини билдириши;

муурожаатчига у билан боғланиш учун аноним алоқа канали ташкил қилишни таклиф қилади (шахс кўрсатилмаган электрон почта манзили, телеграмдаги махфий чат ва.б.);

мурожаатчи ўз аризасидан воз кечмаган тақдирда, мазкур Регламентда назарда тутилган тартибда хабарни қабул қилиши шарт.

13. Божхона органлари ходимлари томонидан олинган хабарларни кўриб чиқиш жараёнида коррупциявий ҳуқуқбузарликларни содир этишнинг сабаб ва шароитлари ҳам таҳлил қилинади ва келгусида уларнинг олдини олиш ҳамда коррупцияга қарши курашиш тизимини такомиллаштириш бўйича тадбирлар амалга оширилади.

14. Олинган хабарлар бўйича барча тааллуқли материаллар, ҳужжатлар ва маълумотлар (шу жумладан, қабул қилинган қарорлар ва мурожаатчиларга юборилган жавоблар) Ташкилий-назорат, хизмат фаолиятини таҳлил қилиш ва баҳолаш тузилмасида қонунчилик ҳужжатларида белгиланган муддатга, шу билан бирга 10 йилдан кам бўлмаган муддатга сақланиши керак.

15. Тааллуқли хабар божхона органларининг жойлардаги таркибий тузилмаларига келиб тушган тақдирда, уни қабул қилган масъул ходимлар зудлик билан ёзма шаклда ҳудудий бошқарма раҳбари ва Шахсий хавфсизлик тузилмаси ходимини келиб тушган хабар тўғрисида хабардор қилади, улар ўз навбатида бу ҳақда ДБК Шахсий хавфсизлик бошқармасига маълум қилади. Шахсий хавфсизлик тузилмалари томонидан олинган хабарлар ушбу Регламентнинг 4-бобида белгиланган тартибга мувофиқ кўриб чиқади.

16. ДБКнинг жойлардаги таркибий тузилмалари ўзларининг ушбу Регламент талабларига мувофиқ Реестрини юритади.

4-боб. Коррупциявий ҳаракатлар ҳақидаги хабарларни кўриб чиқиш

17. Шахсий хавфсизлик тузилмаларига келиб тушган барча тааллуқли хабарлар ушбу тузилманинг масъул ходимлари ёки божхона органлари раҳбари топшириғига асосан бошқа тузилмалар томонидан кўриб чиқилади.

18. Коррупциявий ҳаракатлари тўғрисидаги хабарларни кўриб чиқиш жараёнига, ҳаракатлари устидан тааллуқли хабар келиб тушган ёки кўриб чиқиш жараёнида манфаатлар тўқнашуви юзага келиши мумкин бўлган ходимларни жалб қилиш ман этилади.

19. Тааллуқли хабар келиб тушганда Шахсий хавфсизлик тузилмаси ходими дастлабки текшириш ўтказиб, унинг тааллуқлилигини таҳлил қилади, яъни хабарда кўрсатилган маълумотнинг божхона органлари тизимига тааллуқли коррупцияга оид ҳуқуқбузарликка ва (ёки) манфаатлар тўқнашувига тегишлилигини текширади.

Дастлабки текшириш тааллуқли хабар Шахсий хавфсизлик тузилмасига келиб тушган кундан бошлаб 5 (беш) иш кун ичида амалга оширилади.

20. Мазкур Регламентнинг 19-бандида назарда тутилган дастлабки текшириш натижаларидан қатъий назар, бу ҳақдаги ахборот Реестрга киритилади.

21. Агар Шахсий хавфсизлик тузилмаси ходими хабар тааллуқли эмас деган хулосага келса, бу хабар бир иш кун ичида тегишли тузилмага билдирги асосида ўтказилиши лозим.

22. Агар хабарда коррупциявий ҳаракатлар ва (ёки) манфаатлар тўқнашуви ҳақида маълумот ҳамда хизмат текширувини ўтказиш учун етарли асослар мавжуд бўлса, Шахсий хавфсизлик тузилмаси ходими ДБКнинг ички идоравий ҳужжатларида белгиланган тартибда хизмат текширувини ўтказиш ташаббуси билан чиқади.

23. Тааллуқли хабарларни мазмунан кўриб чиқиш божхона органларига келиб тушган кундан эътиборан 15 кун ичида, текшириш ўтказиш, қўшимча материалларни сўраб олиш ёхуд бошқа чора-тадбирлар кўриш зарур бўлган ҳолларда, уларни кўриб чиқиш муддатлари, божхона органларининг раҳбари томонидан истисно тариқасида узоғи билан бир ойга узайтирилиши мумкин, бу ҳақда мурожаат этувчига (аноним мурожаатлардан ташқари) хабар қилинади.

24. Тааллуқли хабарларни кўриб чиқиш якунларига кўра ўрганиш натижалари ва қўлланилган таъсир чоралари кўрсатилган жавоб хати тайёрланади ва белгиланган тартибда мурожаатчига юборилади.

25. Ижтимоий тармоқдаги канал ва саҳифалар ва телеграм-бот орқали келиб тушган тааллуқли хабарга жавоб мурожаатчига электрон шаклда ушбу тармоқлар орқали юборилади.

5-боб. Ҳисобдорлик

26. Реестрдан Шахсий хавфсизлик тузилмаси ходимлари, хабарларни кўриб чиқишда иштирок этган тегишли бошқа давлат органлари ва ташкилотларининг ходимлари (фақат шундай хабарларга доир), божхона органлари раҳбари ёки унинг ўринбосарлари фойдаланиши мумкин.

27. Реестр маълумотлари асосида Шахсий хавфсизлик тузилмаси ҳар чоракда божхона органлари раҳбарига қабул қилинган коррупциявий ҳаракатлар тўғрисидаги хабарларга тааллуқли бўлган ҳисоботни тақдим этади ва унда қуйидагилар кўрсатилади:

келиб тушган ва кўриб чиқилган тааллуқли хабарлар сони;

коррупциявий ҳаракатлар, манфаатлар тўқнашуви ҳолатлари тасдиқланган тааллуқли хабарлар сони;
кўриб чиқиш муддатлари бузилган тааллуқли хабарлар сони;
тааллуқли хабарларни кўриб чиқишнинг ўртача муддати;
мурожаатчилар томонидан энг кўп фойдаланиладиган алоқа каналлари ва бошқа статистик маълумотлар.

6-боб. Яқуний қоида

28. Мазкур Регламент талабларини бузиш белгиланган тартибда жавобгарликка сабаб бўлади.

